

四庫全書

集部

欽定四庫全書

石倉歷代詩選卷二十一

明 曹學佺 編

初唐八

劉禕之

字希美  
晉陵人

酬鄭沁州

騏閣一代良熊軒千里躅緝圖照國典按部留宸矚匪  
厭承明廬佇兼司隸局芸書暫輟載行使方臨俗節變

金  
風緒高秋深露華溼寒山斂輕靄霽野澄初旭已切長年  
悲誰堪岐路促遙林征馬迅別館嘶驂踟雅贈響撝金  
索居睽倚玉悽斷離鴻引勞歌思足曲

奉和別越王

周屏辭金殿梁驂整玉珂管聲依折柳琴韻動流波鶴  
蓋分陰促龍軒別念多延襟小山路還起大風歌

九成宮秋初應詔

帝園疏金闕仙臺駐玉鑾野分明驚岫路接寶雞壇林

樹千霜積山宮四序寒蟬急知秋早鶯疎覺夏闌怡神  
紫氣外凝睇白雲端舜海詞波發空驚遊聖難

任奉古

字敬臣  
棣州人

和東觀羣賢七月七日臨泛昆明池

秋風始搖落秋水正澄鮮飛眺牽牛渚激賞鏤鯨川岝  
珠淪曉魄池灰斂曙煙泛查分寫漢儀星別構天雲光  
波處動日影浪中懸驚鴻絳蒲弋遊鯉入莊筌萍葉疑  
江上菱花似鏡前長林代輕幄細草即芳筵文華開翠

激筆海控清漣不挹蘭樽聖空仰桂舟仙

和長孫秘監伏日苦熱

玉署三時曉金羈五日歸北林開逸徑東閣敞閒扉池  
鏡分天色雲峰減日輝游鱗映荷聚驚翰遶林飛披襟  
揚子宅舒嘯仰重闈

于季子

詠螢

卉草誠幽賤枯朽絕因依忽逢借羽翼不覺生光輝直

念恩華重長嗟報効微方思助日月為許願曾飛

詠雲

瑞雲千里映祥輝四望新隨風亂馬足泛水結魚鱗布  
葉疑臨夏開花詎待春願得承嘉景無令掩桂輪

早春洛陽答杜審言

梓澤年光往復來杜霸遊人去不廻若非載筆登麟閣  
定是吹簫伴鳳臺路傍桃李花猶嫩波上芙蓉葉未開  
分明寄語長安道莫教留滯洛陽才

南行別弟

萬里人南去三春雁北飛不知歲月得與爾同歸

楊衡

白紵辭二首

玉纓翠珮雜輕羅香汗微漬朱顏酡為君起唱白紵歌  
清聲裊雲思繁多凝笳哀琴時相和金壺半傾芳夜促  
梁塵霏霏暗紅燭令君安坐聽終曲墜葉飄花難再復  
躡珠履步瓊筵輕身起舞紅燭前芳姿艷態妖且妍迴

昨轉袖暗催弦涼風瀟瀟漏水急月華泛灩紅蓮濕牽  
裾攬帶翻成泣

劉允濟

文苑傳云  
洛川人

經廬岳迴望江川想洛陽有作

龜山帝始營龍門禹初鑿出入經變化俯仰憑寥廓未  
若茲山功連延並巫霍東北流艮象西南距坤絡宏阜  
自鬱盤高堙復迴薄勢入柴桑渚陰開彭蠡壑九江沓  
無際七澤紛相錯雲雨散吳會風波騰鄔郡跡隨造化



久利與乾坤博  
矜蠱精氣通  
紛綸潛怪作  
石渠忽見踐  
金房安可託  
地入天子都  
巖有仙人藥  
二門幾迢遞  
三宮何儵爚  
咫尺窮杳冥  
跬步皆恬漠  
才驚羽翰幽  
居靜龍蛇蟄  
明牧振雄詞  
棣華殊灼灼  
盛業匡西夏  
深謀贊禹亳  
黃雲覆鼎飛  
絳氣橫川躍  
佐歷符賢運  
人期茂天爵  
禮樂富垂髻  
詩書成舞勺  
清輝靖蟲電  
利器騰霜鏑  
遊聖挹衢樽  
鄰畿恭木鐸  
牆仞包武侯  
波瀾控文若  
旋聞刈薪楚  
遽覩折葵藿  
稷卨序揆圖  
良平公輔畧  
重臣

資出守英藩諒求瘼豫章觀偉材江州訪靈嶧陽岫曉  
氛氲陰崖暮蕭索潛伏屢鯨奔雄飛更鷲搏驚獮透煙  
霞騰猿亂枝格故園有歸夢他山非行樂帝鄉徒可遊  
湟澗終旅泊景物觀淮海雲霄望河洛城闕紫微星圖  
書玄扈閣神功多粉績元氣猶斟酌丞相下南宮將軍  
趨北落橫簪並附蟬列鼎俱調鶴四郊時迷路五月先  
投龠池榭宣瓊管風花亂珠箔舊遊勞夢寐新知無悅  
樂天寒欲贈言歲暮朋交約夜琴清玉柱秋灰變緹幕

風雲動翰林宮徵調文篇言泉激為浪思緒飛成綴千  
里輝珠璣五采含丹腹鐘鼓旋驚鸚鵡瑾瑜俄抵鵲竊價  
慙庸急叨聲逾寂寞長望限南溟居然翳東郭

詠琴

昔在龍門側誰想鳳鳴時雕琢今為器宮商不自持巴  
人緩踈節楚客弄繁絲欲作高張引翻成下調悲

怨情

玉關芳信斷蘭閨錦字新愁來不自抑念切已含嚔虛

牖風驚夢空牀月厭人歸期倘可促勿度柳園春

魏元忠

本傳云  
宋州人

修書院學士奉勅宴梁王宅

大君敦宴賞萬乘下梁園酒助閒平樂人霑雨露恩榮  
光開帳殿佳氣滿旌門願陪南岳壽長奉北宸樽

銀漢宮侍宴應制

別殿秋雲上離宮夏景移寒風生玉樹涼氣下瑤池漸  
花仍吐葉巖木尚抽枝願奉南山壽千秋長若斯

韋承慶

折楊柳

萬里邊城地三春楊柳節  
葉似鏡中眉花如關外雪  
征人遠鄉思倡婦高樓別  
不忍擲年華含情寄攀折

寒食應制

鳳城春色晚龍禁早暉通  
舊火收槐燼餘寒入桂宮  
鶯啼正隱葉雞闌始開籠  
藹藹瑤山滿仙歌始樂風

南行別弟

澹澹長江水悠悠遠客情落花相與恨到地一無聲

江樓

獨酌芳春酒登樓已半曛誰驚一行雁衝斷過江雲

田遊巖

隱逸傳云  
京兆人

弘農清巖曲有磐石可坐宋十一每拂拭待余

寄詩贈之

信彼稱靈石居然狎遁棲徘徊承翠巘斌駁帶深谿夕  
陰起層岫清景半虹蜺風來應嘯阮波動可琴瑟僕也

潁陽客望彼空思齊儻見山人至簪蒿且杖藜

東方虬

昭君怨

漢道方全盛朝廷足武臣何須薄命妾辛苦事和親  
掩淚辭丹鳳銜悲向白龍單于浪驚喜無復舊時容

春雪

春雪滿空來觸處似花開不知園裏樹若個是真梅

張東之

字孟將  
襄陽人

大堤曲

南國多佳人莫若大堤女  
玉牀翠羽帳寶珠蓮花距  
魂處自目成色授開心許  
迢迢不可見日暮空愁予

東飛伯勞歌

青田白鶴丹山鳳  
婺女姮娥兩相送  
誰家絕世綺帳前  
艷粉紅脂映寶鈿  
窈窕玉堂寒翠幙  
參差繡戶懸珠箔  
絕世三五愛紅妝  
冶袖長裾蘭麝香  
春去花枝俄易改  
可歎年光不相待



出塞

俠客重恩光驄馬飾金裝  
瞥聞傳羽檄馳突救邊荒  
敵野山川動囂天旌旆揚  
吳鉤似明月楚劍利如霜  
電斷衝胡塞風飛出洛陽  
轉戰磨笄俗橫行戴斗鄉  
手擒郅支長面縛谷蠡王  
將軍占太白小婦怨流黃  
腰褭青絲騎娉婷紅粉妝  
三春鶯度曲八月雁成行  
誰堪坐愁思羅袖拂空牀

魏知古

深州人

和中書侍郎楊再思春夜寓直鳳閣懷羣公

拜門傳漏晚寓直索居時昔重安仁賦今稱伯玉詩  
駕池滿不溢雞樹久逾滋夙夜懷山甫清風詠所思

玄元觀尋李先生不遇

羽客今何在空尋伊洛間忽聞歸苦縣復想入函關  
未作千年別猶應七日還神仙不可見寂寞返蓬山

奉和春日途中喜雨

皇輿向洛城時雨應天行麗日登巖送陰雲出野迎  
濯

枝林杏發潤葉渚蒲生絲入綸言喜花依錦字明微臣  
忝東觀載筆佇西成

蘇味道

本傳云趙州樂城人

單于川對雨二首

宗朝邁行雨薄晚屯密雲綠階起素沐竟水聚圓丈河  
柳低未舉山花落已芬清樽久不薦淹留遂待君  
飛雨欲迎旬浮雲已送春還從濯枝後來應洗兵辰氣  
合龍祠外聲過鯨海濱伐邢知有屬已見靜邊塵

正月十五夜

火樹銀花合，星橋鐵鎖開。  
暗塵隨馬去，明月逐人來。  
遊伎皆穠李，行歌盡落梅。  
金吾不禁夜，玉漏莫相催。

詠霜

金祇暮律盡，玉女暝氛歸。  
孕冷隨鍾徹，飄華逐劍飛。  
滯日浮寒影，乘風進晚威。  
自有貞筠質，寧將庶草腓。

詠井

玲瓏映玉檻，澄澈瀉銀牀。  
流聲集孔雀，帶影出羶羊。  
桐

落秋蛙散桃舒春錦芳帝力終何有機心庶此忘

詠石

濟北甄神貺河曲濯錦文聲應天池雨影觸岱宗雲燕  
歸猶可候羊起自成羣何當握靈髓高枕絕囂氛

始背洛城秋郊矚目奉懷臺中諸侍

薄遊黍霜暑直指戒冰心荔浦方南紀蘅臯暫北臨山  
情關塞斷川暮庑城陰場圃通圭甸溝塍礙石林野童  
來捃拾田叟去謳吟蟋蟀秋風起蒹葭晚露深帝城猶

鬱鬱征傳幾駸駸  
迴憶披書地勞歌謝所欽

九江口南濟北接蘄春南與潯陽峴

江路一悠哉滔滔九派來  
遠潭昏似霧前浦沸成雷  
鱗介多潛育漁商幾泝洄  
風搖蜀枺下日照楚萍開  
近潏盆城曲斜吹蠡澤隈  
錫龜猶入貢浮獸罷為災  
津吏揮撓疾郵童整傳催  
歸心詎可問為視落潮迴

崔融

字安成  
濟州人

關山月

月生西海上氣逐邊風壯萬里度關山蒼茫非一狀漢  
兵開郡國胡馬窺亭障夜夜聞悲笳征人起南望

擬古

飲馬臨濁河濁河深不測河水日東注河源迺西極思  
君正如此誰為生羽翼日夕大川陰雲霞千里色所思  
在何處宛在機中織離夢當有魂愁容定無力夙齡負  
奇志中夜三歎息拔劍斬長榆彎弓射小棘班張固非  
擬衛霍行可即寄謝閨中人努力加餐食

和宋之問寒食題黃梅臨江驛

春分自淮北寒食渡江南  
忽見潯陽水疑是宋家潭  
明主閣難叫孤臣逐未堪  
遙思故園陌桃李正酣酣

和梁王衆傳張光祿是王子晉後身

聞有冲天客披雲下帝畿  
三年上賓去千載忽來歸  
昔偶浮丘伯今同丁令威  
中郎才貌是柱史姓名非祇召  
趨龍闕承恩拜虎闈  
丹成金鼎獻酒至玉杯揮天仗分  
旄節朝容間羽衣  
舊壇何處所新廟坐光輝  
漢主存僊



要淮南愛道機朝朝緱氏鶴長向洛城飛

塞上寄內

旅魂驚塞北歸望斷河西春風若可寄暫為遶蘭閨

郭利正

神龍中為吏部員外

上元

九陌連燈影千門徧月華傾城出寶騎匝路轉香車爛  
燭惟愁曉周遊不問家更逢清管發處處落梅花

李崇嗣

武后時為宸府主簿

寒食

普天皆滅焰匝地盡藏煙不知何處火來就客心然

覽鏡

歲去紅顏盡愁來白髮新今朝開鏡匣疑是別逢人

獨愁

聞道成都酒無錢亦可求不知將幾斗銷得此來愁

李福業

嶺外守歲

冬去更籌盡春隨斗柄迴寒暄一夜隔容鬢兩年催

喬知之

文苑傳云  
馮翊人

長信宮中樹

婀娜當軒樹芊茸倚蘭殿色艷九春時風搖五明扇餘  
花鳥弄盡新葉蟲書徧零落心自知芳菲君不見

下山逢故夫

妾身本薄命輕棄城南隅庭前厭芍藥山上采靡蕪春  
風冒紈袖零露濕羅襦羞將憔悴日提籠逢故夫

巫山高

巫山十二峰參差互隱見  
潯陽幾千里周覽忽已徧  
想像神女姿摘芳共珍薦  
楚雲何逶迤紅樹日蔥蒨  
楚雲沒湘源紅樹斷荆門  
郢路不可見況復夜啼猿

從軍行

南庭結白露北風掃黃葉  
此時鴻雁來驚鳴催思妾  
曲房理針線平砧搗文練  
鴛綺裁易成龍鄉信難見  
窈窕九重閨寂寞十年啼  
紗窓白雲宿羅幌月光栖  
雲月隱

微微夜上流黃機玉霜凍珠履金吹薄羅衣漢家已得  
地君去將何事宛轉結蠶書寂寥無雁使平生荷恩信  
本為榮華進况復落紅顏蟬聲催綠鬢

綠珠篇

石家金谷重新聲明珠十斛買娉婷此日可憐君自許  
此時可喜得人情君家閨閣不曾難常將歌舞借人看  
意氣雄豪非分理驕矜勢力橫相干辭君去君終不忍  
徒勞掩袂傷鉛粉百年離別在高樓一代紅顏為君盡

和李侍郎古意

妾家巫山隔漢川  
君度南庭向胡苑  
高樓迢遞想金天  
河漢昭回更愴然  
夜如何其夜未央  
閒花照月愁洞房  
自矜夫壻勝王昌  
三十曾作侍中郎  
一從流落成漁陽  
懷哉萬恨結中腸  
南山暮暮兔絲花  
北陵青青女蘿樹  
由來花葉同一根  
今日枝條分兩處  
三星差池光照灼  
北斗西指秋雲薄  
莖枯花謝枝憔悴  
香銷色盡花零落  
夫人長歎艷容萎  
含情收取摧折枝  
調絲獨彈聲未移

感君行坐星歲遲閨中宛轉今若斯誰能為報征人知

倡女行

石榴酒葡萄漿蘭桂芳茱萸香願君駐金鞍暫此共年  
芳願君解羅襦一醉同匡牀文君正新寡結念在歌倡  
昨宵綺帳迎韓壽今朝羅袖引潘郎莫吹羌笛驚隣里  
不用琵琶喧洞房且歌新夜曲莫弄楚明光此曲怨且  
艷哀音斷人腸

羸駿篇

歎玉長鳴西北來自言當代是龍媒萬里玉關行入貢  
九重金闕為君開蹀躞朝馳過上苑趨暝走發章臺  
玉勒金鞍荷裝飾路傍觀者無窮極小山桂樹比權奇  
上林桃花況顏色忽聞天將出龍沙漠主持將駕鼓車  
去去山川勞日夜遙遙關塞斷煙霞山川關塞十年征  
汗血流離赴月營肌膚銷遠道膂力盡長城長城日夕  
苦風霜中有連年百戰場搖珂嚙勒金羈盡爭鋒足頻  
鐵菱傷垂耳罷輕齋棄置在寒谿大宛蒲海北滇壑雋



崖西沙平留緩步路遠閣頻嘶從來力盡君須棄何必  
尋途我已迷歲歲年年奔遠道朝朝暮暮催疲老扣冰  
晨飲黃河源拂雪夜食天山草楚水澶谿征戰事吳塞  
烏江辛苦地持來報主不辭勞宿昔立功非重利丹心  
素節本無求長鳴向君君不留祇應澶漫歸田里萬里  
低昂任生死君王倘若不見遺白骨黃金猶可市

銅雀妓

金閣惜分香鈿華不重妝空餘歌舞地猶是為君王哀

弦調已絕艷曲不須長共看西陵暮秋煙起白楊

侍宴應制

得分字

紫禁肅晴氛朱樓落曉雲豫遊龍駕轉天樂鳳簫聞竹  
外仙亭出花間輦路分微臣一何幸詞賦奉明君

和蘇員外寓直

自昔重為郎伊人練國章三旬登建禮五夜直明光墨  
草尚書奏衣飄侍御香開軒竹氣靜拂簟蕙風涼曉漏  
離閭闔鳴鐘出未央從來宿臺上天子貴文強

哭故人

生死久離居淒涼歷舊廬歎茲三徑斷不踐十年餘古  
木巢禽合荒庭愛客踈匣留彈罷劒牀積讀殘書玉沒  
終無像蘭言強問虛平生不得意泉路復何如

折楊柳

可憐濯濯春楊柳攀折將來就纖手妾容與此同盛衰  
何必君恩能獨久

喬侃

知之弟

人日登高

僕本多悲者年來不悟春登高一遊目始覺柳條新杜陵猶識漢桃源不避秦暫若昇雲霧遠似出囂塵賴得煙霞氣淹留攀桂人

王無競

字仲烈東萊人

銅雀臺

北登銅雀上西望青松郭總帳空蒼蒼陵田紛漠漠平生事已變歌吹宛猶昨長袖拂玉塵遺情結羅幕妾怨

在朝露君恩豈中薄高臺奏曲終曲終淚橫落

和宋之問嵩山歌

日云暮兮下嵩山路連綿兮松石間出谷口兮見明月  
心徘徊兮不能還

巫山

神女向高唐巫山下夕陽徘徊作行雨婉孌逐荆王  
影江前落雷聲峽外長霽雲無處所臺館晚蒼蒼

王適

文苑傳云  
幽州人

古離別

昔歲驚楊柳高樓悲獨守今年芳樹枝孤栖  
怨別離珠簾晝不捲羅幔曉長垂  
苦調琴先覺愁容鏡獨知頻年雁度無消息  
罷却鴛文何用織夜還羅帳空有情春著  
裊腰自無力青軒桃李落紛紛紫庭蘭蕙日  
氛氲已能憔悴今如此更復含情一待君

銅雀妓

日暮銅雀迥秋深玉座清蕭森松柏望委鬱  
綺羅情君

恩不再得妾舞為誰輕

江上有懷

湛湛江水見底清  
荷花蓮子傍江生  
採蓮將欲寄同心  
秋風落花空復情  
棹歌數曲如有待  
正見明月度東海  
海上雲盡月蒼蒼  
萬里分輝滿洛陽  
洛陽閨閣夜何央  
蛾眉嬋娟斷人腸  
寂寥金屏空自掩  
青熒銀燭不生光  
應憐水宿洞庭子  
今夕迢遙天一方

蜀中言懷

獨坐年將暮常懷志不通有時須問影無事則書空棄  
置如天外平生似夢中蓬心猶是客華髮欲成翁跡滯  
魂逾窘情乖路轉窮別離同夜月愁思隔秋風老少悲  
顏駟盈虛悟翟公時來不可問何用求童蒙

江濱梅

忽見寒梅樹開花漢水濱不知春色早疑是弄珠人

薛稷

字嗣通蒲州汾陰人

早春魚亭山



春氣動百草紛榮時  
斷續白雲自高妙  
徘徊空山曲陽  
林花已紅寒澗苔未綠  
伊余息人事蕭寂無營欲  
客行雖云遠翫之聊自足

秋日還京陝西十里作

驅車越陝郊北顧臨大河  
隔河望鄉邑秋風水增波  
西登咸陽途日暮憂思多  
傳巖既紆鬱首山亦嵯峨  
操築無昔老採薇有遺歌  
客遊節回換人生能幾何

秋朝覽鏡

客心驚落木，夜坐聽秋風。  
朝日看容鬢，生涯在鏡中。

崔液

定州人  
湜弟也

踏歌詞二首

綵女迎金屋，仙姬出畫堂。  
鴛鴦裁錦袖，翡翠貼花黃。  
歌響舞分行，艷色動流光。

庭際花微落，樓前漢已橫。  
金臺催夜盡，羅袖拂寒輕。  
樂笑暢歡情，未半着天明。

代春閨

江南日暖鴻始來柳條初碧葉半開玉關遙遙成未迴  
金閨日夕生綠苔寂寂春色煙色暮簷燕雙雙落花度  
青樓明鏡晝無光紅帳羅衣徒自香妾恨十年長獨守  
君情萬里在漁陽

上元夜六首

玉漏銅壺且莫催鐵門金鎖徹明開誰家見月能閒坐  
何處聞燈不看來

神燈佛火百輪張刻像圖形七寶裝影裏如開金口說

空中似放玉毫光

今年春色勝常年此夜風光最可憐  
鵲樓前新月滿  
鳳凰臺上寶燈然

金勒銀鞍控紫騮玉輪珠幃駕青牛  
驂驛始散東城曲  
倏忽還來南陌頭

公子王孫意氣驕不論相識也相邀  
最憐長袖風前弱  
更賞新弦暗裏調

星移漢轉月將微露灑煙飄燈漸稀  
猶惜路傍歌舞處

金匱要略卷二十一  
踟躕相顧不能歸

張循之

洛陽人

### 巫山高

巫山高不極，合沓狀奇新。  
暗合疑風雨，陰崖若鬼神。  
月明三峽曉，潮滿九江春。  
為問陽臺客，應知入夢人。

### 送泉州李使君之任

傍海皆荒服，分符重漢臣。  
雲山百粵路，市井十洲人。  
執玉來朝遠，還珠入貢頻。  
連年不見雪，到處即行春。

吳少微 新安人

長門怨

月出映層城孤圓上太清  
君王春愛歇枕席涼風生  
怨咽不能寢踟躕步前楹  
空階白露色百草寒蟲鳴  
念昔金房裏猶嫌玉座輕  
如何嬌所悞長夜泣恩情

古意

洛陽芳樹向春開洛陽女  
兒平旦來流車走馬紛相催  
折芳瑤華向曲臺曲臺自有千萬行  
重花累葉間垂楊

北林朝日鏡明光  
南國微風蘇合香  
可憐窈窕女不作  
邯鄲娼妙舞輕迴  
拂長袖高歌浩唱  
發清商歌終舞罷  
歡無極樂往悲來  
長歎息陽春白日  
不少留紅榮碧樹  
無顏色碧樹風花  
先春度珠簾粉澤  
無人顧如何年少  
忽遲暮坐見明月  
與白露明月白露  
夜已寒香衣錦帶  
空珊珊今日陽春  
一妙曲鳳凰樓上  
與君彈

高正臣

廣平人

晦日置酒林亭同用華字

正月符嘉節三春翫物華  
忘懷寄樽酒陶性狎山家  
柳翠含煙葉梅芳帶雪花  
光陰不相惜遲遲落景斜

晦日重宴同用池字

芳辰重遊行乘景共追隨  
班荆陪舊識傾蓋得新知  
水葉分蓮沼風花落柳枝  
自符河朔趣寧羨山陽池

長孫正隱

晦日宴高氏林亭同用華字

晦晚屬煙霞遨遊重歲華  
歌鍾雖戚里林藪是山家  
細



雨猶開日深池不漲沙淹留迷處所巖岫幾重花


上元夜效小庾體同用春字

薄晚嘯遊人車馬亂驅塵月光三五夜燈焰一重春煙  
雲迷北闕簫管識南隣洛城終不閉更出小平津

徐皓

晦日宴高氏林亭同用華字

綺筵乘暇景瓊醕對年華門多金埒騎路引璧人車頻  
早猶藏葉梅殘正落花藹藹林亭晚餘興促流霞



石倉歷代詩選卷二十一

欽定四庫全書

集部  
石倉歷代詩選卷二十三

詳校官庶吉士<sub>臣</sub>范逢恩

侍讀<sub>臣</sub>孫球覆勘

總校官進士<sub>臣</sub>朱鈐

校對官編修<sub>臣</sub>盛惇崇

謄錄監生<sub>臣</sub>張恒

欽定四庫全書

石倉歷代詩選卷二十二

明 曹學佺 編

初唐人

陳子昂

感遇詩

蘭若生春夏  
芊蔚何青青  
幽獨空林色  
朱蕤冒紫莖  
遲遲白日晚  
嫋嫋秋風生  
歲華盡搖落  
衆芳竟何成

卷二十二  
蒼蒼丁零塞今古緬荒途  
亭堠何摧兀暴骨無全軀  
黃沙幕南起白日隱西隅  
漢甲三十萬曾以事匈奴  
但見沙場死誰憐塞上孤

白日每不歸青陽時暮矣  
茫茫吾何思林卧觀無始  
衆芳委時晦鵲鳴悲耳鴻  
荒固已頽誰識巢居子

吾愛鬼谷子青谿無垢氛  
囊括經世道遺身在白雲  
七雄方龍鬪天下亂無君  
浮榮不足貴遵養晦時文  
舒可彌宇宙卷之不盈分  
豈徒山水壽空與麋鹿羣

呦呦南山鹿罹咎以媒和招搖青桂樹幽靈亦成科世  
情甘近習榮耀紛如何怨憎未相復親愛生禍羅瑤臺  
傾巧笑玉杯殞雙蛾誰見枯城蘖青青成斧柯

林居病時久水木澹孤清閒卧觀物化悠悠念無生青  
春始萌達朱火已滿盈徂落方自此感歎何時平

臨岐泣世道天命良悠悠昔日殷王子玉馬遂朝周寶  
鼎淪伊穀瑤臺成古丘西山傷遺老東陵有故侯

翡翠巢南海雄雌珠樹林何知美人意驕愛比黃金殺

身炎州裏委羽玉堂陰  
旖旎光首飾歲蕤爛錦衾  
豈不在遐遠虞羅忽見尋  
多材信為累歎息此珍禽

玄蟬號白露茲歲已蹉跎  
羣物從大化孤英將奈何  
瑤臺有青鳥遠食玉山禾  
崑崙見玄鳳豈復虞雲羅

荒哉穆天子好與白雲期  
宮女多怨曠層城閉蛾眉  
日耽瑤池樂豈傷桃李時  
青苔空萎絕白髮生羅帷

朝發宜都渚浩然思故鄉  
故鄉不可見路隔巫山陽  
巫山綵雲沒高丘正微茫  
佇立望已久涕淚沾衣裳  
豈茲



越鄉感憶昔楚襄王朝雲無處所荆國亦淪亡

可憐瑤臺樹灼灼佳人姿碧華映朱實攀折青春時豈  
不盛光寵榮君白玉墀但恨紅芳歇凋傷感所思

竭來豪遊子勢利禍之門如何蘭膏歎感激自生冤衆  
趨明所避時棄道猶存雲淵既已失羅網與誰論箕山  
有高節湘水有清源惟應白鷗鳥可為洗心言

金鼎合神丹世人將見欺飛飛騎羊子胡乃在峨眉變  
化固非類芳菲能幾時疲疴苦淪世憂悔日侵淄眷然

顧幽褐白雲空涕洟

朔風吹海樹蕭條邊已秋  
亭上誰家子哀哀明月樓  
自言幽燕客結髮事遠遊  
赤九殺公吏白頭報私讐  
竄身至海上被役此邊州  
故鄉三千里遼水復悠悠  
每憤胡兵入常為漢國羞  
何如七十戰白首未封侯

浩然坐何慕吾蜀有峨眉  
念與楚狂子悠悠白雲期  
時哉悲不會涕泣久漣漣  
夢登綏山穴南采巫山芝  
探元觀羣化遺世從雲螭  
婉孌時永矣感悟不見之

薊丘覽古贈盧居士藏用七首

丁酉歲吾北征出自薊門歷觀燕之舊都其城池  
霸迹已蕪昧矣乃慨然仰歎憶昔樂生鄒子羣賢  
之遊盛矣因登薊丘作七詩以志之寄終南盧居  
士亦有軒轅之遺跡也

軒轅臺

北登薊丘望求古軒轅臺應龍已不見收馬空黃埃尚  
想廣成子遺跡白雲隈

燕昭王

南登碣石坂遙望黃金臺丘陵盡喬木昭王安在哉霸  
圖悵已矣驅馬復歸來

樂生

王道已淪昧戰國競貪兵樂生何感激仗義下齊城雄  
圖竟中天遺歎寄阿衡

燕太子

秦王日無道太子怨亦深一聞田光義匕首贈千金其

事雖不立千載為傷心

田光先生

自古皆有死狗義良獨稀奈何燕太子尚使田生疑伏  
劍誠已矣感我涕沾衣

鄒子

大運淪三代天人罕見窺鄒子何寥廓謾說九瀛垂興  
亡已千載今也則無推

郭隗

逢時獨為貴歷代非無才隗君亦何幸遂起黃金臺

西還至散關答喬補闕知之

歲蕤蒼梧鳳嘹唳白露蟬羽翰本無匹結交何獨全昔  
君事胡馬余得奉戎旃攜手向沙塞關河緬幽燕芳歲  
幾陽止白日屢徂遷功業雲臺薄平生佩玉捐歎此南  
歸日猶聞北戍邊代水不可涉巴山亦潺湲攬衣度函  
谷銜涕望秦川蜀門自茲始雲山方浩然

題居延古城贈喬十二知之

聞君東山意宿昔紫芝榮滄州今何在華髮旅邊城還  
漢功既薄逐胡策未行徒嗟白日暮坐對黃雲生桂枝  
芳欲晚薏苡謗誰明無為空自老含歎負生平

征東至淇門答宋叅軍之問

南星中大火將子涉清淇西林改微月征旆空自持碧  
潭去已遠瑤華折遺誰若問遼陽戍悠悠天際旗

答洛陽主人

平生白雲志早愛赤松遊事親恨未立從宦此中州主

人亦何問旅客非悠悠方謁明天子清晏奉良籌再取  
連城壁三陟平津侯不然拂衣去歸從海上鷗寧隨當  
代子傾側且沉浮

酬暉上人秋夜山亭有贈

皎皎白林秋微微翠山靜禪居感物變獨坐開軒屏風  
泉夜聲雜月露宵光冷多謝忘機人塵憂未能整

酬暉上人夏日林泉

聞道白雲居窈窕青蓮宇巖泉萬丈流樹石千年古林



卧對軒窓山陰滿庭戶方釋塵事勞從君襲蘭杜

送別出塞

平生聞高義書劔百夫雄言登青雲去非此白雲翁胡  
兵屯塞下漢騎屬雲中君為白馬將腰佩騂角弓單于  
不敢射天子佇深功蜀山余方隱良會何時同

登薊丘樓送賈兵曹入都

東山宿昔意北征非我心孤負平生願感涕下沾襟暮  
登薊樓上永望燕山岑遼海方漫漫胡沙飛且深峨眉

杳如夢仙子  
曷由尋擊劍  
起歎息白日忽西沈  
聞居洛陽使因子寄南音

秋園卧病呈暉上人

幽寂曠日遙  
林園轉清密  
疲痾澹無豫  
獨坐汎瑤瑟  
懷挾萬古情  
憂虞百年疾  
綿綿多滯念  
忽忽每如失  
緬想赤松遊  
高尋白雲逸  
榮吝始都喪  
幽人遂貞吉  
圖書紛滿牀  
山木藹盈室  
宿昔心所尚  
平生自茲畢  
願言誰見知  
梵筵有同術  
八月高秋晚  
涼風正蕭瑟

登澤州城北樓讌

平生倦遊者觀化久無窮復來登此國臨望與君同坐  
見秦兵壘遙聞趙將雄武安君何在長平事已空且歌  
玄雲曲御酒舞薰風勿使青衿子嗟爾白頭翁

度荆門望楚

遙遙去巫峽望望下章臺巴國山川盡荆門煙霧開城  
分蒼野外樹斷白雲隈今日狂歌客誰知入楚來

晚次樂鄉縣

故鄉杳無際日暮且孤征川原迷舊國道路入邊城野  
戍荒煙斷深山古木平如何此時恨噉噉夜猿鳴

同王員外雨後登開元寺南樓因酬暉上人獨

坐山亭有贈

鍾梵經行罷香林坐入禪巖庭交雜樹石瀨瀉鳴泉水  
月心方寂雲霞思獨玄寧知人世裏疲病得攀緣

詠主人壁上畫鶴寄喬主簿崔著作

古壁仙人畫丹青尚有文獨舞紛如雪孤飛暖似雲自

矜彩色重寧憶故池羣江海聯翩翼長鳴誰復聞

居延海樹聞鶯同作

邊地無芳樹鶯歌勿聽新聞關如有意愁絕若懷人明  
妃失漢寵蔡女沒胡塵坐聞應落淚况憶故園春

送魏大從軍

匈奴猶未滅魏絳復從戎悵別三河道言追六郡雄雁  
山橫代北孤塞接雲中勿使燕然上惟留漢將功

送殷大入蜀

禺山金碧路此地饒英靈送君一為別悽斷故鄉情片  
雲生極浦斜日隱離亭坐看征騎沒惟見遠山青

落第西還別劉祭酒高明府

別館分周國歸驂入漢京地連函谷塞川接廣陽城望  
迴樓臺出途遙煙霧生莫言長落羽貧賤一交情

落第西還別魏四懔

轉蓬方不定落羽自驚弦山水一為別歡娛復幾年離  
亭暗風雨征路入雲煙還因北山逕歸守東陂田

送客

故人洞庭去楊柳春風生相送河洲晚蒼茫別思盈  
白蘋已堪把綠葢復含榮江南多桂樹歸客贈生平

春夜別友人二首

銀燭吐青煙金樽對綺筵離堂思琴瑟別路遶山川  
明月隱高樹長河沒曉天悠悠洛陽道此會在何年  
紫塞白雲斷青春明月初對此芳樽夜離憂悵有餘清  
冷花露滿滴瀝簷宇虛懷君欲何贈願上大臣書

遂州南江別鄉曲故人

楚江復為客征棹方悠悠故人憫追送置酒此南洲平生亦何恨夙昔在林丘違此鄉山別長謠去國愁

送東萊王學士無競

寶劍千金買平生未許人懷君萬里別持贈結交親孤松宜晚歲衆木愛芳春已矣將何道無令白首新

送梁李二明府

負書猶在漢懷策未聞秦復此窮秋日芳樽別故人黃



金裝屢盡白首契逾新  
空羨雙鳬鳥俱飛向玉輪

送著作佐郎崔融等從梁王東征

金天方肅殺白露始專征  
王師非樂戰之子慎佳兵  
海氣侵南部邊風掃北平  
莫賣盧龍塞歸邀麟閣名

春晦餞陶七於江南同用風字

黃鶴煙雲去青江琴酒同  
離帆方楚越溝水復西東  
笑蓉生夏浦楊柳送春風  
明日相思處應對菊花叢

夏日遊暉上人房

山水開精舍琴歌列梵筵人疑白樓賞地似竹林禪對  
戶池光亂交軒巖翠連色空今已寂乘月弄澄泉

春日登金華觀

白玉仙臺古丹丘別望遙山川亂雲日樓榭入煙霄鶴  
舞千年樹虹飛百尺橋還疑赤松子天路坐相邀

晦日宴高氏林亭同用華字

并序

有渤海之宗英是平陽之貴戚發揮鳳臺而嘯侶  
幽贊雞川而留宴冠纓濟濟多延戚里之賓鸞鳳

鏘鏘自有文雅之客

尋春遊上路追宴入山家主第簪纓滿皇州景望華玉  
池初吐溜珠樹始開花歡娛方未極林閣散餘霞

白帝城懷古

日落滄江晚停橈問土風城臨巴子國臺沒漢王宮荒  
服仍周甸深山尚禹功巖懸青壁斷地險碧流通古木  
生雲際孤帆出霧中川途去無限客思坐何窮

峴山懷古

秣馬臨荒甸登高覽舊都猶悲墮淚碣尚想卧龍圖  
城邑遙分楚山川半入吳丘陵徒自出賢聖幾凋枯  
野樹蒼煙斷津樓晚氣孤誰知萬里客懷古正踟躕

宿讓河驛浦

沿流亂北渚結纜宿南洲合岼昏初夕迴塘暗不流  
卧聞塞鴻斷坐聽峽猿愁沙浦明如月汀葭晦若秋  
不及能鳴雁徒思海上鷗天河殊未曉滄海信悠悠

秋日遇荊州府崔兵曹使宴

輜軒鳳皇使林藪鷗雞冠江湖一相許雲霧坐交歡興  
盡崔亭伯言忘釋道安林光稍欲暮歲物已將闌古樹  
蒼煙斷虛庭白露寒瑤琴山水曲今日為君彈

于長史山池三日曲水宴

摘蘭藉芳月被宴坐迴汀汎灩清流滿歲蕤白芷生金  
絃揮趙瑟玉柱弄秦箏巖榭風光媚郊園春樹平煙花  
飛御道羅綺照昆明日落紅塵合車馬亂縱橫

合州津口別舍弟至東陽峽步趨不及眷然有

憶作以示之

江潭共為客，洲浦獨迷津。  
思積芳庭樹，心斷白眉人。  
同衾成楚越，別島類胡秦。  
林岼隨天轉，雲峰逐望新。  
遙遙終不見，默默坐含嚔。  
念別疑三月，經遊未一旬。  
孤舟多逸興，誰共爾為隣。

萬州曉發放舟東漲還寄蜀中親朋

空濛巖雨霽，爛熳曉雲歸。  
嘯旅乘明發，奔橈驚斷磯。  
蒼茫林岼轉，絡繹漲濤飛。  
遠岼孤煙出，遙峰曙日微。  
前瞻

未能暇坐望已相依曲直多今古經過失是非還期方  
浩浩征思日駢駢寄謝千金子江海事多違

入峭峽安居谿伐木谿源幽邃林嶺相映有奇  
致焉

肅徒歌伐木驚檝漾輕舟靡迤隨迴水潺湲沂淺流煙  
沙分兩岼露島夾雙洲古樹連雲密交峰入浪浮巖潭  
相映媚谿谷屢環周路迴光逾逼山深興轉幽麝鼯寒  
思晚猿鳥暮聲秋誓息蘭臺策將從桂樹遊因書謝親

愛千歲覓蓬丘

入東陽峽與李明府舟前後不相及

東巖初解纜南浦遂離羣  
出沒同洲島沿洄異渚濱  
風煙猶可望歌笑浩難聞  
路轉青山合峰迴白日曛  
奔濤上漫漫積水下沄沄  
倏忽猶疑及差池復兩分  
離離間遠樹藹藹沒遙氛  
地上巴陵道星連牛斗文  
孤狖啼寒月哀鴻叫斷雲  
仙舟不可見搖思坐氛氲

題田洗馬遊巖桔槔



望苑長為客  
商山遂不歸  
誰憐北陵井  
未息漢陰機

石倉歷代詩選卷二十二

欽定四庫全書

石倉歷代詩選卷二十三

明 曹學佺 編

初唐十

杜審言

字必簡  
襄陽人

南海亂石山作

漲海積稽天羣山高業地相傳稱亂石圖典失其事懸  
危悉可驚大小都不類乍將雲島極還與星河次上聲

忽如飛下臨仍欲墜朝暾赭丹楮夜魄炯青翠宮崇霧  
雨蓄幽隱靈仙閼萬尋掛鶴巢千丈垂猿臂昔去景風  
涉今來姑洗至觀此得詠歌長時想精異

送和西蕃使

使出鳳凰池京師陽春晚聖朝尚邊策詔諭兵戈偃拜  
手明光殿搖心上林苑種落踰青羌關山度赤坂疆場  
及無事雅歌而餐飯寧獨錫和戎更當封定遠

蓬萊三殿侍宴奉敕詠終南山應制

北斗掛城邊南山倚殿前雲標金闕迴樹杪玉堂懸半  
嶺通佳氣中峰繞瑞煙小臣持獻壽長此戴堯天

宿羽亭侍宴應制

步輦千門出離宮二月開風光新柳報宴賞落花催碧  
水搖空閣青山繞吹臺聖情留晚興歌管送餘杯

賦得妾薄命

草綠長門掩苔青永巷幽寵移新愛奪淚落故情留啼  
鳥驚殘夢飛花攪獨愁自憐春色罷團扇復迎秋

和韋承慶過義陽公主山池

野興城中發朝英物外求情懸朱紱望契動赤泉遊海  
燕巢書閣山雞舞畫樓雨餘清晚夏共坐北巖幽  
携琴遶碧沙搖筆弄青霞杜若幽庭草芙蓉曲沼花宴  
遊成野客形勝得山家徃徃留仙步登攀日易斜

攢石當軒倚懸泉度牖飛鹿麝銜妓席鶴子曳童衣園  
果嘗難徧池蓮摘未稀卷簾惟待月應在醉中歸

和晉陵陸丞早春遊望

獨有宦遊人偏驚物候新雲霞出海曙梅柳渡江春淑  
氣催黃鳥晴光轉綠蘋忽聞歌古調歸思欲霑巾

秋夜宴臨津鄭明府宅

行止皆無地招尋獨有君酒中堪累月身外即浮雲露  
白宵鐘徹風清曉漏聞坐攜餘興往還似未離羣

和康五庭芝望月有懷

明月高秋迴愁人獨夜看暫將弓並曲翻與扇俱團霧  
濯清輝苦風飄素影寒羅衣一此鑒頃使別離難

登襄陽城

旅客三秋至層城四望開楚山橫地出漢水接天回冠  
蓋非新里章華即舊臺習池風景異歸路滿塵埃

旅寓安南

交趾殊風候寒遲暖復催仲冬山果熟正月野花開積  
雨生昏霧輕霜下震雷故鄉踰萬里客想倍從來

春日懷歸

心是傷歸望春歸異往年河山鑒魏闕桑梓憶秦川花



離芳園鳥風和綠野煙更懷歡賞地車馬洛橋邊

代張侍御傷美人

二八泉扉掩帷屏寵愛空淚痕銷夜燭愁緒亂春風巧  
笑人疑在新妝曲未終應憐脂粉氣猶著舞衣中

送高郎中北使

北狄顧和親東京發使臣馬銜邊地雪衣染異方塵歲  
月催行旅思榮變苦辛歌鐘期重錫拜手落花春

夏日過鄭七山齋

卷二十三  
共有樽中好言尋谷口來薜蘿山逕入荷芰水亭開日  
氣含殘雨雲陰送晚雷洛陽鐘鼓至車馬繫遲回

送崔融

君王行出將書記遠從征祖帳連河闕軍麾動洛城旌  
旃朝朔氣笳吹夜邊聲坐覺煙塵掃秋風古北平

經行嵐州

北地春光晚邊城氣候寒往來花不發新舊雪仍殘水  
作琴中聽山疑畫裏看自驚牽遠役艱險促征鞍

重九日宴江陰

蟋蟀期歸晚  
茱萸節候新  
降霜青女月  
送酒白衣人  
高興要長壽  
卑棲隔近臣  
龍沙即此地  
舊俗坐為隣

晦日宴遊

日晦隨萸萸  
春情著杏花  
解紳宜就水  
張幕會暹沙  
歌管風塵度  
池臺日半斜  
更看金谷騎  
爭向石崇家

七夕

白露含明月  
青霞斷絳河  
天街七襄轉  
閣道二神過  
竚

服鏘環珮香筵拂綺羅年年今夜盡機杼別情多

守歲侍宴應制

季冬除夜接新年帝子王孫捧御筵宮闕星河低拂樹  
殿庭燈燭上薰天彈絃奏節梅風入對局探鈞栢酒傳  
欲向正元歌萬壽暫留歡賞寄春前

大酺

毘陵震澤九州通士女歡娛萬國同伐鼓撞鐘驚海上  
新妝袿服照江東梅花落處疑殘雪柳葉開時任好風

火德雲官逢道泰，長地久屬年豐。

春日京中有懷

今年遊寓獨遊秦，愁思看春不當春。  
上林苑裏花徒發，細柳營前葉漫新。  
公子南橋應盡興，將軍西地幾留賓。  
寄語洛城風日道：明年春色倍還人。

春日江津遊望

旅客搖邊思，春江弄晚晴。  
煙消垂柳弱，霧捲落花輕。  
飛棹乘空下，回流向日平。  
鳥啼移幾處，蝶舞亂相迎。  
忽歎

人皆濁隄防水至清谷王常不讓深可戒中盈

泛舟送鄭卿入京

帝坐蓬萊殿恩追社稷臣長安遙向日宗伯正乘春相  
宅開基地傾都送別人行舟縈綠水列戟滿紅塵酒助  
歡娛洽風催景氣新此時光乃命誰為惜無津

度石門山

石門千仞斷迸水落遙空道束懸崖半橋欹絕澗中仰  
攀人屢息直下騎纔通泥擁奔蛇徑雲埋伏獸叢星躔

牛斗北地脉象牙東開塞隨行變高深觸望同江聲連  
驟雨日氣抱殘虹未改朱明律先舍白露風堅貞深不  
憚險澁諒難窮有異登臨賞徒為造化功

贈蘇綰書記

知君書記本翩翩為許從戎赴朔邊紅粉樓中應計日  
燕支山下莫經年

渡湘江

遲日園林悲昔遊今春花鳥作邊愁獨憐京國人南竄

不似湘江水北流

戲贈趙使君美人

紅粉青娥映楚雲  
桃花馬上石榴裙  
羅敷獨向東方去

謾學他家作使君

劉希夷

一名庭芝  
汝州人

將軍行

將軍闢轅門耿介當風立  
諸將欲言事逡巡不敢入  
劒氣射雲天鼓聲振原隰  
黃塵塞路起走馬追兵急  
彎弓



從此去飛箭如雨集截圍一百重斬首五千級代馬流血死胡人抱鞍泣古來養甲兵有事常討襲乘我廟堂運坐使干戈戢獻凱歸京師軍容何翕習

從軍行

秋天風颯颯羣胡馬行疾嚴城晝不開伏兵暗相失天子廟堂拜將軍凶門出紛紛晉陽道戎馬幾萬足軍門壓黃河兵氣衝白日平生懷仗劍慷慨即投筆南登漢月孤北走代雲密近取韓彭計早知孫吳術丈夫清萬

里誰能掃一室

春女行

春女顏如玉怨歌陽春曲巫山春樹紅沅江春草綠自  
憐妖艷姿妝成獨見時愁心伴楊柳春盡亂如絲目極  
千餘里悠悠春江水流頻想玉關人愁卧金閨裏尚言春  
花落不知秋風起嬌愛猶未終悲涼從此始憶昔楚王  
宮玉樓妝粉紅纖腰弄明月長袖舞春風容華委西山  
光陰不可還桑林沒東海富貴今何在寄言桃李容胡

為閨閣重但看楚王墓惟有數株松

孤松篇

蠶月桑葉青鶯時柳花白澹艷煙雨姿敷芬陽春陌如  
何秋風起零落從此始獨有南澗松不歎東流水玄陰  
天地冥皓雪朝夜零豈不罹寒暑為君留青青青青好  
顏色落落任孤直羣樹遙相望衆草不敢逼靈龜卜真  
隱仙鳥宜栖息耻受秦帝封願言唐侯食寒山夜月明  
山冷氣清清淒兮歸風集吹之作琴聲松子卧仙岑寂

聽疑野心清冷有真曲  
樵採無知音美人何時來幽徑  
委綠苔吁嗟深澗底棄捐廣厦材

嵩嶽聞望

月出嵩山東月明山益空  
山人愛清景散髮卧秋風  
風止夜何清獨夜草蟲鳴  
仙人不可見乘月近吹笙絳脣  
吸靈氣玉指調真聲真聲是何曲  
三山鸞鶴情昔去落塵俗  
願言聞此曲今來卧嵩岑  
何幸承幽音神仙樂吾事  
笙歌銘夙心

秋日題汝陽潭壁

獨坐秋陰生悲來從所適行見汝陽潭飛蘿蒙水石懸  
瓢木葉上風吹何歷歷幽人不耐煩振衣步閒寂迴流  
清見底金沙覆銀礫錯落非一文空隴幾千尺魚鱗可  
憐紫鴨毛自然碧吟咏秋水篇渺然忘損益秋水隨形  
影清濁混心迹歲暮歸去來東山余宿昔

采桑

楊柳送行人青青西入秦誰家采桑女樓上不勝春盈

盈灞水曲步步春芳綠紅顏耀明珠絳脣含白玉回首  
渭橋東遙憐春色同青絲嬌落日綰綺弄春風攜籠長  
歎息遲遲戀春色看花若有情倚樹疑無力薄暮思悠  
悠使君南陌頭相逢不相識歸去夢青樓

巫山懷古

巫山幽陰地神女艷陽年襄王何容色落日望悠然歸  
來高唐夜金缸焰青煙頽心卧瑤席夢魂何翩翩搖落  
殊未已榮華倏徂遷愁思滿湘浦悲涼雲夢田猿啼秋

風夜雁飛明月天  
巴歌不可聽聽此益潺湲

歸山

歸去嵩山道  
煙花覆青草  
草綠山無塵  
山青楊柳春日暮  
松聲合空歌  
思殺人

代閨人春日

珠簾的曉光  
玉顏艷春彩  
林間鳥鳴喚  
戶外花相待  
花鳥惜芳菲  
鳥鳴花亂飛  
人今伴花鳥  
日暮不能歸  
池月憐歌扇  
山雲愛舞人  
佳期楊柳陌  
攜手莫相違

春日行歌

山樹落梅花飛落野人家野人何所有滿甕陽春酒攜  
酒上春臺行歌伴落梅醉罷臥明月乘夢遊天台

江南曲八首

暮宿南洲草晨行北岼林日懸滄海濶水隔洞庭深煙  
景無留意風波有異尋歲遊難極目春戲易為心朝夕  
無榮遇芳菲已滿襟

艷唱潮初落江花露未晞春洲驚翡翠朱服弄芳菲畫



舫煙中淺青陽日際微錦帆衝浪濕羅袖拂行衣含情  
罷所採相歎惜流暉

君為隴西客妾遇江南春朝遊含靈果夕採弄風蘋果  
氣時不歇蘋花日自新以此江南物持贈隴西人空盈  
萬里懷欲贈竟無因

皓如楚江月靄若吳岫雲波中自皎鏡山上亦氤氲明  
月留照妾輕雲持贈君山川各離散光氣乃殊分天涯  
一為別江北不相聞

艤舟乘潮去風帆振草涼潮平見楚甸天際望維楊洄  
汴經千里煙波接兩鄉雲明江嶼出日照海流長此中  
逢歲晏浦樹落花芳

暮春三月晴維揚吳楚城城臨大江汜迴映洞浦清晴  
雲謁金閣珠樓碧煙裏月明芳樹羣鳥飛風過長林雜  
花起可憐離別誰家子於此一至情何已

北堂紅草盛丰茸南湖碧水照芙蓉朝遊暮起金花盡  
漸覺羅裳珠露濃自惜妍華三五歲已歎關山千萬重

人情一去無還日欲贈懷芳怨不逢

憶昔江南年盛時平生怨在長洲曲  
冠蓋星繁江水上衝風標落洞庭淥  
落花滿袖紅紛紛朝霞高閣洗晴雲  
誰言此處嬋娟子珠玉為心以奉君

擣衣篇

秋天瑟瑟夜漫漫夜白風清玉露溥  
燕山遊子衣裳薄秦地佳人閨閣寒  
欲向樓中縈楚練還來機上裂齊紈  
攬紅袖兮愁徙倚盼青砧兮悵盤桓  
盤桓徙倚夜已久

螢火雙飛入簾牖西北風來吹細腰  
東南月上浮纖手此時秋月可憐明  
此時秋風別有情君看月下參差影  
為聽莎間斷續聲絳河轉兮青雲  
曉飛鳥鳴兮行人少攢眉緝縷思  
紛紛對影穿斜視悄悄聞道還家  
未有期誰憐登隴不勝悲夢見形  
容亦舊日為許裁縫改昔時絨書  
遠寄交河曲須及明年春草綠  
莫言衣上有斑斑只為思君淚  
相續

公子行

天津橋下陽春水天津橋上繁華子馬聲迴合青雲外  
人影動搖綠波裏綠波蕩漾玉為沙青雲離披錦作霞  
可憐楊柳傷心樹可憐桃李斷腸花此日遨遊邀美女  
此時歌舞入娼家娼家美女鬱金香飛去飛來公子傍  
的的珠簾白日映娥娥玉顏紅粉妝花際裊裊雙蛺蝶  
池邊顧步兩鴛鴦傾國傾城漢武帝為雲為雨楚襄王  
古來容光人所羨況復今日遙相見願作輕羅着細腰  
願為明鏡分嬌面與君相向轉相親與君雙棲共一身

願作貞松千歲古誰論芳槿一朝新百年同謝西山日  
千秋萬古北邙塵

代悲白頭翁

洛陽城東桃李花飛來飛去落誰家幽閨兒女好顏色  
坐見落花長歎息今年花落顏色改明年花開復誰在  
已見松栢摧為薪更聞桑田變城海古人無復洛城東  
今人還對落花風年年歲歲花相似歲歲年年人不同  
寄言金盛紅顏子須憐半死白頭翁此翁白頭真可憐

伊昔紅顏美少年公子王孫芳樹下清歌妙舞落花前  
光祿池臺文錦繡將軍樓閣畫神仙一朝臥病無相識  
三春行樂在誰邊宛轉蛾眉能幾時須臾鶴髮亂如絲  
但看古來歌舞地惟有黃昏鳥雀悲

代秦女贈行

鸞鏡曉含春蛾眉向影頻開箱衣裳破那堪粉黛新春  
還洛陽道為憶春階草楊葉未能攀梅花待君掃今朝  
喜鵲傍人飛應是狂夫走馬歸遙想行歌共遊樂迎前

含笑著春衣

洛中晴月送殷四入關

清洛浮橋南渡頭  
天晶萬里散華洲  
晴看石瀨光無數  
曉入寒潭浸不流  
微雲一點曙煙起  
南陌憧憧徧行子  
欲將此意與君論  
復道秦關向千里

入塞

將軍陷虜圍邊務  
息戎機霜雪交河盡  
旌旗入塞飛曉  
光隨馬度春色  
伴人歸課績朝明主  
臨軒拜武威



覽鏡

青樓桂明鏡臨照不勝愁白髮今如此人生能幾時秋  
風下山路明月上春期歎息君恩盡容顏不可思

晚春

佳人眠洞房回首見垂楊寒盡鴛鴦被春生瑤瑁牀庭  
陰幕青靄簾影散紅芳寄語同心伴迎春且薄妝

餞李秀才赴舉

鴻鵠振羽翮翻飛入帝鄉朝鳴集銀樹暝宿下金塘日

月天門近風煙夜路長自憐窮浦雁歲歲不隨陽

夜集張諲所居

江南成久客門館日蕭條惟有圖書在多傷鬢髮凋諸  
生陪講誦稚子洽漁樵  
隱室寒燈淨空階落葉飄滄洲  
自有趣誰道隱須招

故園置酒

酒熟人須飲春還序已秋願逢千日醉得緩百年憂舊  
里多青草新知盡白頭風前燈易滅川上月難留  
卒卒

周公旦栖栖孔氏丘平生能幾日不及且遨遊

晚憩南陽旅館

旅館何年廢征夫此日過  
途窮人自哭春至鳥還歌  
行路新知少荒田古逕多  
池篁覆丹谷墳樹遶清波  
日照蓬陰轉風微野氣和  
傷心不可去回首怨如何

李嶠

字巨山  
趙州人

奉教追赴九成宮途中口號

委質承仙翰祇命遙遙策事偶從梁遊人非背淮客長

驅歷川阜迴眺窮原澤鬱鬱桑柘繁油油禾黍積雨餘  
林氣靜日下山光夕未攀叢桂巖猶倦飄蓬陌行當奉  
麾蓋慰此勞行役

秋山望月酬李騎曹

秋客坐山隈懷抱自悠哉況復高秋夕明月正徘徊亭  
亭出迴岫皎皎映層臺色帶銀河滿光含玉露開淡雲  
籠影度虛暈抱輪迴谷邃涼陰靜山空夜響哀寒催數  
雁過風送一螢來獨軫離居恨遙想故人杯

早發苦竹館

合沓巖嶂深，朦朧煙霧曉。荒阡下樵客，野猿驚山鳥。開  
門聽潺湲，入徑尋窈窕。棲鶻抱寒木，流螢飛暗篠。早霞  
稍霏霏，殘月猶皎皎。行看遠星稀，漸覺遊氛少。我行撫  
輶傳，兼得傍林沼。貪翫水石奇，不知川路渺。徒憐野心  
曠，詎測浮年小。方解寵辱情，永託累塵表。

擬古東飛伯勞西飛燕

傳書青鳥迎，簫鳳巫嶺荆。臺數通夢夢，誰家窈窕住閣樓。

五馬千金照陌頭  
羅裳玉珮當軒出  
點翠施紅競春日  
佳人二八盛舞歌  
羞將百萬呈雙蛾  
庭前芳樹朝夕改  
空駐妍華欲誰待

汾陰行

君不見昔日西京全盛時  
汾陰后土親祭祀  
祠宮宿寢設儲供  
撞鐘鳴鼓樹羽旂  
漢家五葉才且雄  
賓筵萬靈服  
九戎柏梁賦詩高宴罷  
詔書法駕幸河東  
河東太守親掃除  
奉迎至尊尊鑒輿  
五營夾道列容衛  
三河縱觀

空里間迴旌駐蹕降靈場焚香奠醑邀百祥金鼎發色  
正焜煌靈祇煒燁攄景光埋玉陳牲禮神畢舉麾上馬  
乘輿出彼汾之曲嘉可遊木蘭為楫桂為舟棹歌微吟  
綵鷁浮箭鼓哀鳴白雲秋歡娛宴洽賜羣后家家復除  
戶牛酒聲明動天樂無有千秋萬歲南山壽自從天子  
向秦關玉輦金車不復還珠簾羽扇長寂寞鼎湖龍髯  
安可攀千齡人事一朝空四海為家此路窮雄豪意氣  
今何在壇場宮館盡蒿蓬路逢故老長歎息世事回環

不可測昔時青樓對歌舞今日黃埃聚荊棘山川滿目  
淚沾衣富貴榮華能幾時不見祇今汾水上惟有年年  
秋雁飛

奉和送金城公主適西蕃應制

漢帝撫戎臣絲言命錦輪還將弄機女遠嫁織皮人曲  
怨關山月妝消道路塵所嗟濃李樹空對小榆春

立春日侍宴內殿出剪綵花應制

早聞年欲至剪綵學芳辰綴綠竒能似裁紅巧逼真花



從篋裏發葉向手中春不與時光競何名天上人

甘露殿侍宴應制

月宇臨丹地雲窓網碧紗御筵陳桂醑天酒酌榴花水  
向浮橋直城連禁苑斜承恩恣歡賞歸路滿煙霞

奉和七夕兩儀殿會宴應制

靈匹三秋會仙期七夕過查來人泛海橋渡鵲填河帝  
縷升銀閣天機罷玉梭誰言七襄詠重入五絃歌

酬杜五弟晴朝獨坐見贈

平明坐虛館曠望幾悠哉宿霧分空盡朝光度隙來影  
低藤架密香動藥闌開未展山陽會空留池上杯

送崔主簿赴滄州

紫陌追隨日青門相見時宦遊從此去離別幾年芳  
桂中樽酒幽蘭下調詞他鄉有明月千里照相思

送李邕

落日荒郊外風景正淒淒離人席上起征馬路傍嘶別  
酒傾壺贈行書掩淚題殷勤御溝水從此各東西

又送別

歧路方為客芳樽暫解顏人隨轉蓬去春伴落梅還白  
雲度汾水黃河繞晉關離心不可問宿昔鬢成斑

月

桂滿三五夕冀分二八時清輝飛鵲鑑新影學蛾眉皎  
潔臨踈牖玲瓏鑒薄帷願言從愛客清夜幸同嬉

露

滴瀝明花苑葳蕤泣竹叢玉垂丹棘上珠湛綠荷中夜

警千年鶴朝零七月風願凝仙掌內長奉未央宮

雪

瑞雪驚千里從風下九霄地疑明月夜山似白雲朝  
逐舞花光動臨歌扇影飄大風天闕路今日海神朝

舟

征棹三江暮連檣萬里迴相烏風際轉畫鷁浪前開羽  
客乘霞至仙人弄月來何當同傳說特展巨川材

扇

翟羽舊傳名蒲葵價不輕花芳不滿面羅薄詎障聲禦  
熱含風細臨秋帶月明同心如可贈特表合歡情

桂

未值銀宮裏寧移玉殿幽枝生無限月花滿自然秋俠  
客條為馬仙人葉作舟願君明道術攀折可淹留

柳

楊柳鬱氤氲金堤總翠氛庭前花類雪樓際葉如雲列  
宿分龍影芳池寫鳳文短簫何以奏攀折為思君

鵲

不分荆山抵甘從石印飛危巢畏風急繞樹覺星稀喜  
逐行人至愁隨織女歸儻遊明鏡裏朝夕動光輝

人日侍宴大明宮恩賜綵縷人應制

鳳城景色已含韶人日風光倍覺饒桂吐半輪迎此夜  
蓂開七葉應今朝魚猜水凍行猶澀鶯喜春熙弄欲嬌  
愧奉登高搖彩翰欣逢御氣上丹霄

太平公主山亭行宴應制

黃金瑞榜絳河隈  
白玉仙輿紫禁來  
碧樹青岑雲外聳  
朱樓畫閣水中開  
龍舟下瞰鮫人室  
羽節高臨鳳女臺  
遽惜歡娛歌吹曉  
揮戈更卻曜靈回

奉和幸韋嗣立山莊侍宴應制

南洛師臣契東巖  
王佐居幽情遺紱  
冕宸眷屬樵漁制  
下峒山蹕恩迴  
灞水輿松門駐旌  
蓋薜幄引簪裾  
石磴平黃陸煙樓  
半紫虛雲霞仙路  
近琴酒俗塵踈  
喬木千齡外懸泉  
百丈餘崖深經煉  
藥穴古舊藏書樹  
宿搏風

鳥池潛縱壑魚寧知天子貴尚憶武侯廬

倡婦行

十年倡家婦三秋邊地人紅妝樓上歌白髮隴頭新  
夜風霜苦年年征戍頻山西長落日塞北久無春團扇  
辭恩寵迴文贈苦辛胡兵屢攻戰漢使絕和親消息如  
瓶井沈浮似路塵空餘千里月照妾兩眉頻

餞薛大夫護邊

荒隅時未通副相下臨戎授律星芒動分兵月暈空犀



皮擁青囊象齒飾彫弓決勝三河勇長驅六郡雄登山  
窺代北屈指計遼東佇見燕然上抽毫頌武功

和杜學士旅次淮口阻風


夕吹生寒浦清淮上暝潮迎風欲舉棹觸浪反停橈淼  
漫煙波濶參差林岸遙日沈丹氣斂天敞白雲銷水雁  
銜蘆葉沙鳬隱荻苗客行殊未已川路幾迢迢

中秋月

盈缺青冥外東風萬古吹何人種丹桂不長出輪枝

送司馬先生

蓬閣桃源兩處分  
人間海上不相聞  
一朝琴裏悲黃鶴  
何日山頭望白雲



石倉歷代詩選卷二十三